

共同經課 - 1 列王記上二十一章一節~二十一 a 節

1 Chiah-ê t̄i-chì 了後, Iâ-su-liát 人 Ná-pòk 有葡萄園 t̄i Iâ-su-liát, 近撒馬利亞王 A-hap ê 宮。2 A-hap kā Ná-pòk 講, 你用你 ê 葡萄園 hō 我, 我 thang 做菜園; 因為是近 t̄i 我 ê 宮; 我 beh 用 koh-khah 好 ê 園 kā 你換; á 是你 ài 銀, 我就照價錢 hō 你。3 Ná-pòk kā A-hap 講, 用我 ê 祖所留 ê 業 hō 你, chit-ê t̄i-chì 願耶和華禁止我。4 A-hap 因為 Iâ-su-liát 人 Ná-pòk 所講 ê 話, 就鬱卒無歡喜; tò 去伊 ê 厝; 因為 Ná-pòk bat 講, 我 m̄ 用我 ê 祖業 hō 你, A-hap 就倒 t̄i 眠床, 面 ng 內面, 也 m̄ 食。5 王后 Iâ-sé-piat 到伊 hia, 問伊講, 你 ê 心內憂悶續 m̄ 食, 是啥緣故 ah? 6 伊 kā 伊講, 因為我對 Iâ-su-liát 人 Ná-pòk 講, 你用你 ê 葡萄園 hō 我, 我用銀 hō 你; á 是你若 ài, 我就用葡萄園換你。伊講, 我 ê 葡萄園, 我 m̄ hō 你。7 王后 Iâ-sé-piat kā 伊講, 你 chit-chūn 是 teh 管理以色列國 á-m̄ 是? 做你起來食, hō 你 ê 心歡喜; 我 beh 用 Iâ-su-liát 人 Ná-pòk ê 葡萄園 hō 你。8 就用 A-hap ê 名寫 phoe, 用王 ê 印 tng 伊; 寄 hiah-ê phoe hō Ná-pòk ê 城, hō kap 伊 khiā 起 ê 長老貴族。9 寫 t̄i phoe 裡講, Lín tiòh 宣布禁食, hō Ná-pòk 坐 t̄i 百姓間 ê 高位; 10 koh 設兩個匪類 t̄i 伊 ê 面前, 做干證告伊講, 你謗瀆上帝 kap 王; 然後就拖伊出去, 用石頭 tím 死伊。11 伊城內 ê 人, 就是 khiā 起 hit-ê 城 ê 長老, kap 貴族, 就照 Iâ-sé-piat 所寄 ê 話, 就是照伊寄 hō in ê phoe 所寫 ê, 來行。12 宣布禁食, hō Ná-pòk 坐 t̄i 百姓間 ê 高位。13 Hit 兩個匪類入去, 坐 t̄i 伊 ê 面前; 匪類當百姓 ê 面前做干證告 Ná-pòk 講, Ná-pòk 謗瀆上帝 kap 王; 就拖伊出城外, 用石頭 tím 死伊。14 就差人去 kā Iâ-sé-piat 講, Ná-pòk 已經 hō 石頭 tím 死 lah。15 Iâ-sé-piat 聽見 Ná-pòk hō 石頭 tím 死, Iâ-sé-piat 就 kā A-hap 講, 你起來掌 Iâ-su-liát 人 Ná-pòk m̄ 肯爲 tiòh 價錢 hō 你 ê 葡萄園, 因為 Ná-pòk 已經死, 無命 lah。16 A-hap 聽見 Ná-pòk 已經死, A-hap 就起來, 落去 Iâ-su-liát 人 Ná-pòk ê 葡萄園 hia, beh 掌伊。17 耶和華 ê 話臨到 Thê-su-pí 人以利亞, 講, 18 你起來, 去見 tiàm t̄i 撒馬利亞 ê 以色列王 A-hap; 伊落去 Ná-pòk ê 葡萄園 beh 掌伊; chit-chūn 伊 t̄i-hia。19 你 tiòh kā 伊講, 耶和華 án-ni 講, 你有 thài 死人 koh 掌伊 ê 業 mah? Koh tiòh kā 伊講, 耶和華 án-ni 講, 狗 t̄i 甚麼所在舐(chī)Ná-pòk ê 血, 狗也 beh t̄i-hia 舐你 ê 血, 就是你本身 ê 血。20 A-hap kā 以利亞講, 我 ê 對敵 ah, 你 chhē-tiòh 我 mah? 伊應講, 我 chhē-tiòh 你, 因為你賣家己, 行耶和華看做 phái" ê 事。21 耶和華講, 我 beh 降災厄 hō 你, beh 一盡除你。

共同經課 - 2 詩篇五篇一節~八節

1 大衛 ê 詩, 交 hō 樂官; 用 pùn ê 樂器。1) 耶和華 ah, 求你 àn 耳孔聽我 ê 話。 鑑察我 ê 心思。2 我 ê 王, 我 ê 上帝 ah, 求你 àn 落聽我求叫 ê 聲: 因為我 ng 你祈禱。3 耶和華 ah, 早起時你會聽我 ê 聲; 早起時我 beh 對你排列我 ê 心意, 續 beh 瞭望。4 因為你 m̄ 是歡喜罪惡 ê 上帝; Phái"-ê boē 得 thang kap 你同 khiā 起。5 驕傲 ê 人 boē 能 khiā t̄i 你 ê 面前; 做 phái" ê 人 lóng 是你所怨恨。6 講白賊 ê, 你 beh 滅 in; Ai thài 人 kap 奸詭 ê, lóng 是耶和華所厭惡。7 論到我, 我 beh 憑你豐盛 ê 慈愛入你 ê 厝; 我 beh chūn 敬畏你 ê 心, ng 你 ê 聖殿來敬拜。耶和華 ah, 求你因為我 ê 對敵, 憑你 ê 公義 chhoā 我; Hō 你 ê 路 t̄i 我 ê 面前正直。

共同經課 - 3 加拉太書二章十五節~二十一節

15 咱出世做猶太人, m̄ 是外邦 ê 罪人。16 既然知人得 tiòh 稱做義, m̄ 是 tui thàn 律法, 獨獨 tui 信耶穌基督, 咱也有信靠基督耶穌, hō 咱 tui 信基督得 tiòh 稱做義, m̄ 是 tui thàn 律法, 因為 tui thàn 律法無人能得 tiòh 稱做義。17 Ta 設使咱 teh 求 t̄i 基督得 tiòh 稱做義, 也家己 iáu-kú 顯出做有罪 ê 人, án-ni 基督是罪惡 ê 差用 mah? 斷斷 m̄ 是; 18 因為我若 koh 起我前所廢 ê, 就是表明家己做犯法 ê 人。19 因為我 tui 律法, 就 ng 律法已經死, beh hō 我 ng 上帝來活。20 我 bat kap 基督同釘十字架; 我 iáu-kú teh 活, m̄ 是猶原我, 就是基督 tiàm-t̄i 我 teh 活; koh 我現今 t̄i 肉體所有 ê 活, 是在 t̄i 信上帝 ê Kiá" 來活, 伊 bat 疼我, 替我獻家己。21 我無廢無上帝 ê 恩典; 因為 tui 律法若會得 tiòh 義, 就基督無因端來死。

共同經課 - 4 路加福音七章三十六節~八章三節

36 有一個法利賽人請耶穌 sa"-kap 食, 伊就入法利賽人 ê 厝坐桌。37 Tú-tng 城內有一個 phái" 婦人人, 知伊坐桌 t̄i 法利賽人 ê 厝, 就 toà toé 香油 ê 玉罐來; 38 khiā t̄i 耶穌 ê 後面, oá 伊 ê 腳 teh 啼哭; 有目屎滴 t̄i 伊 ê 腳, 就用伊 ê 頭毛拭伊; koh chiáp-chiáp chim 伊 ê 腳, 用香油抹伊 39 請耶穌 ê 法利賽人看見 án-ni, 心內想講, Chit 人若是先知, 的確會知摸伊 ê 人是 chī-chūi, koh 是甚麼號 ê 婦人人, 就是 phái" 人。40 耶穌應伊講, 西門, 我有話 beh kā 你講。西門講, 先生, 請你講。41 伊就講, 某個債主有兩人欠伊 ê 債, 一個欠伊五百 ê 銀 á, 一個欠伊五十。42 In 既然無 thang 還, 債主就赦免 in 兩人。Án-ni, 就 tá-lòh 一個 khah 疼債主 ah? 43 西門應講, 我 phah 算是 hit-ê hō 伊赦免 khah choē ê。耶穌 kā 伊講, 你所斷 ê 是 tiòh。44 就 oát 頭 ng 婦人人, kā 西門講, 你看見 chit-ê 婦人人無? 我入你 ê 厝, 你無用水 hō 我洗腳; 但是伊用目屎滴 t̄i 我 ê 腳, 用頭毛拭伊 45 你無 kā 我 chim; 獨獨伊 tui 我入來 ê 時 chim 我 ê 腳無 soah。46 你無用油抹我 ê 頭殼; 但是伊用香油抹我 ê 腳。47 所以我 kā 你講, 伊 choē-choē ê 罪 koà 已經赦免, 因為伊 ê 疼是 choē; 但是得 tiòh 赦免少 ê, 伊 ê 疼伊 ā 是少。48 就 kā 婦人人講, 你 ê 罪赦 lah。49 同桌 ê 人心內講, Chit-ê teh 赦罪 ê 是甚麼人? 50 耶穌 tui 婦人人講, 你 ê 信有救你; 做你安心 tò 去。1 過無幾日, 耶穌四界行 tak ê 城 tak ê 鄉社, 宣傳來報揚上帝國 ê 福音; 十二個學生也 kap 伊去; 2 也有幾 nā ê 婦人人, 有 ê bat 患 tiòh 鬼, 有 ê 有破病, ta" 已經得 tiòh 醫好; 其中有 Boát-tāi-liáp ê 馬利亞, bat 有七個鬼對伊出去; 3 koh 有希律 ê 管家 Khó-sat ê bó Iok-a-ná; koh 有 So-sat-ná; 以外 iáu 有 choē-choē 婦人人, lóng 用 in 所有 ê 來服事 in。